

Dnevni avaz: Intervju sa visokim predstavnikom Valentinom Inzkom



Dnevni avaz: Šta je cilj Vaših konsultacija s liderima političkih stranaka, ima li kakve nade?

Valentin Inzko: Kako institucije počinju s radom nakon završetka sezone godišnjih odmora, ovi sastanci su prilika da se razgovara o pitanjima koja se trebaju rješavati u vezi s provođenjem reformi. Apeliram na političke lidere i institucije da intenziviraju svoje napore kako bi osigurali napredak Bosne i Hercegovine, posebno na njenom putu ka EU i NATO-u. U Federaciji BiH također podsjećam političke stranke na njihove obaveze da provedu odluku Ustavnog suda BiH o izbornom sistemu u Mostaru, što je uslov definiran Dejtonskim sporazumom. Želim potaknuti stranke u Federaciji da se konstruktivno uključe u lokalne procese koji su trenutno u toku i predlože reforme u Federaciji sa ciljem da taj entitet učine funkcionalnijim i ekonomičnijim.

Dnevni avaz: Je li Vaše angažiranje oživljavanje klinički mrtvog OHR-a?

Valentin Inzko: Tokom proteklih nekoliko godina moji prethodnici i ja namjerno smo imali pristup koji je bio manje intervenistički, a fokusirao se na promoviranje lokalne odgovornosti i nadležnosti, kako bi ova zemlja sigurno išla putem ka priključivanju euroatlantskim strukturama. To je bila dosadašnja politika Vijeća za provedbu mira i ostalih

institucija međunarodne zajednice i to će biti naša politika i ubuduće.

Istovremeno, iako se tokom godina uloga OHR-a u BiH znatno izmijenila u skladu s politikom Upravnog odbora Vijeća za provedbu mira, ja i dalje imam važan mandat i smatram da bi bilo neozbiljno s moje strane ne održavati redovne kontakte s političkim liderima i rukovodećim institucijama u ovoj zemlji.

Bilo bi mi daleko draže ukoliko bi mediji takva pitanja postavljali liderima ove zemlje. Kakve mjere planiraju poduzeti u pogledu oživljavanja njihove uloge u odnosu na potrebe građana, i to ne samo one potrebe koje se odnose na ispunjavanje preostalih uslova za integraciju u EU i NATO?

Dnevni avaz: Namjeravate li predložiti konkretna rješenja liderima političkih stranaka?

Valentin Inzko: Ovo je 2013. godina, što znači da je prošlo 18 godina od završetka rata i potpisivanja Dejtonskog mirovnog sporazuma. Međunarodna zajednica više ne želi davati prijedloge u ime domaćih političara, kao što je to radila, ukoliko ne pokažu barem neki stepen fleksibilnosti i spremnosti na kompromis. Uprkos ogromnim naporima međunarodne zajednice, nije postignut nikakav sporazum kada je u pitanju Mostar ili presuda „Sejdić-Finci“. OHR, Evropska unija i ostali međunarodni akteri mogu pružiti pomoć u pronalaženju rješenja, ali ne možemo natjerati političare da rade svoj posao.

Dnevni avaz: Šta ako nema dogovora među stranačkim liderima?

Valentin Inzko: Dogovor među strankama je jedini put naprijed, nema alternative, jer stalna stagnacija će imati negativan utjecaj na percepciju o BiH, i ovdje i u inostranstvu, a to onda obeshrabruje investicije, koje bi donijele nova radna mjesta.

Pitam se: ako su politički lideri ozbiljni kada je riječ o

privlačenju stranih ulaganja koja će donijeti nova radna mjesta, zašto svojim ponašanjem investitore navode na zaključak da ova zemlja nije dovoljno stabilna za njihove investicije? Političari iz svih dijelova zemlje treba da počnu zajedno raditi i doprinositi da se postigne ono što žele svi građani: bolji životni standard, više radnih mjesta i napredak u evroatlantskim integracijama.

Dnevni avaz: Kako Vi gledate na sve veći broj napada na bošnjačke povratnike?

Valentin Inzko: Pažljivo pratim šta se dešava sa povratnicima. Posebno su me užasnuli nedavni napadi na povratnike u Zvorniku. Dobro je da je načelnik odmah osudio napade. Očekujem od nadležnih vlasti da u potpunosti istraže šta se dogodilo, na pravedan i objektivan način.

Dnevni avaz: Da li ruske prijetnje bojkotom dovode u pitanje funkcioniranje Upravnog odbora PIC-a?

Valentin Inzko: Rusija je vrijedan član međunarodne zajednice i učestvuje u svim sjednicama Upravnog odbora PIC-a. Nisu najavili niti prijetili nikakvim bojkotom.